

四庫全書

集部

欽定四庫全書

集部

竹溪齋十一藁續集卷一

三

詳校官庶吉士_臣李傳熊

主事_臣呂雲棟覆勘

總校官知縣_臣楊懋珩

校對官助教_臣胡予襄

謄錄監生_臣張曾詣

欽定四庫全書

集部四

竹溪鬳齋十一葉續集

別集類三宋

提要

臣等謹案竹溪鬳齋十一葉續集三十卷宋林希逸撰希逸有考工記解別著錄宋史藝文志載希逸有鬳齋前集六十卷久佚不存惟續集謂之竹溪十一稿者尚有傳本即此三十卷也凡詩五卷襍著一卷少作三卷記二卷序一卷

跋一卷四六三卷省題詩二卷輓詩一卷祭
文一卷墓誌二卷行狀二卷學記四卷其門
人福清林式之所編共十三類而謂之十一
稿不詳其故或十中存一之意與劉克莊嘗
謂乾淳間林光朝始好深沈之思為文極鍛
鍊一傳為林亦之再傳為陳藻三傳為希逸
比其師槁乾中見華滋蕭散中見嚴密窘狹
中見紆徐所以推許之者甚至今觀其集多

應酬頌美之作且以道學名一世而上賈似
道啟乃極口稱譽至以趙普文彥博比之殆
與楊時之從蔡京同一白璧之瑕集末載學
記其中解太玄經者居其半詩亦多宗門語
為王士禎居易錄所譏然南宋遺集流傳日
少其詩文雖不盡如劉克莊所稱而尚不失
前人軌度其學記中所論學問文藝之事亦
時有可取錄而存之用備一家之言固無不

可耳前有咸淳庚午林同序稱戊辰九月上
擢庸齋長仙蓬侍緝熙明年春再入禁林長
詞翰趨行之詔聯翩而下行有日至是而續
集之入梓者為卷三十云云則是集成於希
逸內召時也乾隆四十四年九月恭校上

總纂官臣紀昀 臣陸錫熊 臣孫士毅

總校官 臣陸費墀

竹溪庸齋十一藁續集原序

庸齋林先生之自玉堂翠帷求奉太夫人出臨莆郡也
實淳祐戊申後村先師時方辭宗正少卿之召先皇以
魏國年高就畀憲節即家建臺一時麾節照映之盛真
有壺山之所未有賓僚乎其間者蓋莫不人自磨濯奮
勵求以所講習所蘊蓄所設施而於學問於文章於政
事有可以表表自見者爨下之音囊中之穎又夫孰無
是心哉既而臺與郡各以郡之法曹掾為舉首掾則同

之再從兄子敬也甫於七閩為軍壘子敬於郡幕為底僚一旦捷出騰上受國士之知於二先生是所謂空羣於冀北拔尤於河陽者其榮且耀固萬萬而始是臬臺襮表已具中以親嫌為疑雖重之魏國之命有不能自決惟一聞守侯合薦之說乃定此造就之仁終始之誼子敬於庸齋不無重惓惓焉後村第一集六十卷之行也亦子敬効程督其間前五十卷則庸齋在郡時以却例卷資其費及易鎮延平通守王公實緒成之今後十

卷卷未有子敬監雕名銜在焉可考也故子敬於欲以
自表其惓惓焉者則亦惟於庸齋之若詩與文思所以
淑後學詔來世如庸齋之於後村焉且可與後村諸集
相為不朽於穹壤之間是固子敬之心也而素食貧多
家居願有莫之遂志亦莫之渝其於前集後集之行亦
惟知於顏楊二君致其歡喜贊歎焉爾歸自括家食又
且十年及通守三陽咸淳戊辰秋抵官下將一考以書
為同言吾此來得綰郡紱薄有俸入節縮裹飪銖積寸

累或有可以足吾生平未足之志者願以庸齋集為先
子其為我請續集於先生而行之且毋以憚煩辭同敬
諾於是庸齋方卷退處之懷袖觀之手其年秋九月上
擢庸齋長仙蓬侍緝熙明年春再入禁林掌詞翰蓋是
癸亥東歸一閒七朞矣舊詞臣真學士有不惟一堂之
上明良胥會於所都俞者則然下而九州四海人士亦
孰不曰是當行鋪席也是我家舊物也顧非斯文之一
泰吾道之一春乎庸齋屢辭不獲命趨行之詔聯翩而

下行有日至是而續集之入梓者為卷三十矣昔人懷
一飯之感捐千金之報以情不以物以誼不為利也況
舉之入雲壑之上天乎寂寂誰從翟廷尉滔滔去事霍
將軍此後村所以為世道感也此同為子敬別庸齋續
集三十卷為一集之意也庸齋前集亦六十卷續集宜
視前繼自今賡殿閣之吟陪羶厦之咨雲霧裁剪日月
獻納必且至於手抄而腕脫者當揭為文續集以遂子
敬兄之志云是年為庚午春為正月元夕前一日石塘

林同謹書

欽定四庫全書

竹溪鬳齋十一藁續集卷一

宋 林希逸 撰

古律詩

和後村憶昔二首

應世只愁一著差
少曾苦學鬢今華
愛牛因見無傷也
喻馬還非俱是耶
工苦從人夸腹藁
發明自我看心花
蠅頭蝸角人間事
回首驚看似亂麻

金匱要略卷一
白雲深處卧元英莫問卿君與我卿說向老禪成寐語
誤他壯士爲虛名鏤脂須信文徒巧隔膜只愁性未明
空忍饑窮吟樂府也疑太祝似心盲

和後村口占一首

老去田翁多狎友年來觀主換新銜緣溪竹杖時行散
面壁蒲團漸放參休夢筆花尋硯滴但看貝葉守燈龕
清朝越紉將修禮畱滯何妨似史談

和後村唐衣二首

非晉非唐落魄袍人生行樂不知他
可曾癡說飛霞佩
那肯吟思疊雪羅帶眼減多癯已甚
布毛吹盡意如何
溪鄰更有苓箬伴時整蓑衣共緝莎

初服能尋恨已遲便如野鹿脫拘維
閒因解帶迎風處
凍憶穿靴立雪時老守漁蓑隨分樂
古多蟬冕歎機危
不知窮苦哦詩相破帽從前畧似誰

和後村記顏一首

精神歸阿堵一點定如何問景論蛇跗
吹毛笑鳥窠鬢

金明池
卷一
知誰甚似音比舊尤訛但擁維摩几時時閱貝多

和後村漫興一首

儒冠能誤甫休憶早充賓既得林間趣甘爲局外人
法書喜皇象古畫愛公麟屢典衣償直因癡不恨貧

行田間見新秧作

丙寅三月初九日

新秧成段見連連風弄輕柔雨後鮮細出水如青縷
線平鋪田似綠毛氈國貧民困憂無日身遠心存冀有年
試問維魚誰入夢牧童三五澗頭眠

錦溪謁墳作

鞠育恩深愧老身少營甘旨苦長貧
如今有酒空澆酹對此傷心十一春

松下殷勤奠獻回山房四望小徘徊
常年不似今年晚待得花時過盡來

資福嶺菴前作

嶺內有神祠舊時課社十日一集其間

嶺路松陰好歸鞭為小停苔封石面紫藤絡樹身青
菴古無人住蟬多過客聽少時文會處近裏有祠庭

和莆田陳宰篠塘庵韻

賢有十
不去

竹根牆下一燈龕舊事傷心未易談十頌尚留禪髓在
諸方應作話頭參高情寫入陽春調遠望吟思落日酣
魔種紛紛堪可笑得君點破料知慙

崇安忌日

丙寅四月

生死涂分久追懷謾自傷憐渠眉舊白歎我髮今黃聚
散萍來去悲歡夢短長縱能排遣盡此日亦難忘

踰月苦旱忽得邑宰喜雨詩用韻二首

丙寅四月
十二日

連日非無數點飛濱溪底見響春機甘霖君已吟成卷
炎赫吾方汗濕衣雷邑未能均澤施龍君可要逐方祈
箋天更仗伊誰力外史臣慙似螳微

布穀催耕歎雨乾諸賢歡詠我辛酸瓢分不到田猶涸
琴化雖均天作難底要歲遺三九食但爲民幾一分寬
未縣龍骨魚無夢那得新租上送官

和蕭教韻

聲華六館壓羣雄獨坐羣比信國工弟子三千徒共

喜法筵第一義尤公我開薦口慙如愈守自知名盍敬
融料得芹香畱不住會須班入大明宮

四月二十日得雨方足聞城間一禱即應沾渥
久矣此餘波所及也再用前韻一首寄呈恕

齋

晴雲卷盡雨雲飛多謝元工已轉機懇切敷陳綠封事
殷勤持送紫霞衣十連如佛仁均施一念於民福可祈
秧馬既閒青徧野搖搖爭弄晚風微

和一隱堂

義江陳吏部

少陵那肯縛微官，謾結陶廬雜市闌。
五客昂藏圖素壁，一翁偃蹇對青山。
我因月憶人千里，公比雲居僧半間。
老去得閒應浪喜，何如未老已先閒。

堂中畫鶴
鷗五禽

賀後村得第七孫

恰喜長房兒納婦，蘭階又報送麒麟。
一夢四海名千載，三鳳諸孫見七人。
新綴錦綳饒獻笑，賸畱寶硯要分珍。
太翁從此應投鐏，却許貂金映鬢銀。

既旱得雨連日不小住

旱餘得雨又傷多塵世因饑百種魔便使有方能辟穀
我雖獨樂奈人何

喜雨還憂雨過多人生可煞是多魔事難恰好天誰問
天本無心可奈何

再和後村得孫韻

含飴方樂燕嘉賓畫果犀錢勝壁麟老鳳遶看雛鳳好
猶龍行見共龍人孫誇奇骨礪如玉翁喜龐眉從以珍

產有萬金誰敵此他山何羨器車銀

送用和劉推官入京班改

幕畫如兄有異才嶺南聲價動諸臺登龍尾道呼班去
爲鰐魚州守印來定有賞音相料理何妨進卷小徘徊
遙知得意行吟處傍柳堤看菡萏開

山丹已盛

夏半葵榴亦頓空臨池還未見芙蓉花神也念翁岑
寂數本山丹著意紅

小盆新種水芝方有生意

買石殷勤種水芝主人欲速訝渠遲
朝來喜見芽如粟點點青青上下枝

行楮

救楮爲謀意甚忠人間豈不願流通
未論子母權輕重無奈官民價異同

州縣入納只用時價紐中半之數

產計高低藏自可

用難節縮出何窮秤提須信無奇策
賤則因多少則穹

和吳帥古靈祠堂韻

學問功深筆硯靈南來題詠徧吾閩詩書禮樂宗元帥
俎豆衣冠友昔人顏色如存滿梁月襟懷長想浴沂春
新成輦革添吟句傳入圖經字字珍

用珍字韻謝吳帥分惠乃弟山泉所寄廬山新
茗一首

五老峰前草自靈若為封畧入南閩錦囊有句知難弟
玉帳多情寄野人雲脚似浮廬瀑雪水痕堪鬪建溪春
龍團拜賜前身夢得此烹嘗勝食珍

題郭進士所進萬世寶鼎鑒

學苦功深老更癯
儲闈一念許渠渠
掄才合作金閨彥
忠國無踰寶鼎書
未見龍圖攜處士
但聞狗監薦相如
明時主相求賢急
指日香名入詔除

謝劉正秦惠文戲效昌黎體仍用送賈浪仙韻

一首

可人忽及門
瑩骨清照膽
銜袖子何謙
拜手吾豈敢
于嗟泥尚蟠
有興月可攬
何居欲困衡
迺爾蹈坎窞
萬言

蛹吐絲一第髭摘領攀天桂非高佳境蕉方噉但思俗
茫茫頗怪雲黯黯顧我方阨窮相看合悽慘藿食忘酣
饕大羹鄙漓澹甘守竹筴疇憶蓋菡萏孤熊羆狸狌
芳卉雜葭莢躡藉衆靡憐訪求情易感玉肆混琳珉珍
筵侶菹歎豈伊厭葱珎雅欲共藜糝見覲失漣漣聞雷
嗟坎坎儷箋價編瓊璆葉憤削槧新知乍激昂老我長
頗頷惟應旌翹翹曾是御惜惜期君騏驥驤眇彼蜉蝣
撼層青富脩程墳索且玄覽

和後村二首

瓊筵追補慶樗菴壽宿熒熒耀斗南詩勝盧仝酬馬異
客無李四與張三

深村酒小溪魚李四張三來便畱

顏紅鬢白國元老

眼赤腰黃世美談索和多慙供狗尾公如大楚僕毛聃

其二

但喜僧歌不壞菴可曾佞佛學和南溪深却有鷗千百
城遠何妨家兩三詩未能工多類句書無高論搃常談
身窮久欲逃名姓任把秦儋作史聃

耳鳴戲作

底事虛聰裏長聞風雨聲史嘗云蟻鬪醫却比蟬鳴老
縱聾何惜愁因聒易生道書疑太誕如磬是丹成

丹書
云第

三轉則耳中常有
笙磬鳳凰之聲

六月二十四日雨後苦熱作

今年一旱熱良苦既雨纔晴熱如故桔槔甕閒稍解憂
赤日當空蒸濕土晚田切切更望霖早禾已失十四五
溪泉漸涸衆撮眉老我垂頭汗如雨有身有患信可憐

金匱要略卷一
亦既憂農還畏暑

樂軒遠日之祀巖尹方兄賦以七言用韻一首
事師如父理云然到底難忘講席前身在必憂惟忌日
義存雖死似生年親祠執奠疑容見淺學孤恩枕膝傳
長愧後生香一瓣玉樓十二抵三千

得大慧頂相有親筆贊

贊中有呼聚
又喝散之語

見師畫像如師活聚散如何呼又喝似與不似吾不
知却是夢中青直裰

四睡戲題

多少醒人作寐語異形同趣誰知汝四頭十足相枕眠
寒山拾得豐干虎

其像三人交頭枕虎而睡

詠松石

松化為石

生生化化果何如物類雖殊氣不殊疎密尚留松脈理
嵒巖却是石肌膚今身肯羨陳三品往事堪羞秦大夫
斲藥仙翁何處問雲根還似樹根無

和柯山玉上人三首

身如孤鶴萬緣空吟得交情底許濃我老學禪無長進
相逢却講少陵宗

聞說高人意已消非坡誰解識參寥何年共賦浮花雪

一棹清溪兩岸苔

坡詩溪上苔
花似浮雪

贊盡俱佳見似親殷勤遠寄證前因雖然說我夢中夢

却要知渠身外身

知某曾夢大慧似
慧自贊頂相見寄

賀後村生日慶八十

星履班頭跨錦韉乞身玉座賦歸田當行兩制文章老

來處三壺功行仙生比萊公過半月占求尚父恰今年

先皇法從新皇憶須落前銜拜榻前

七月二十九日生
寇公七月十四日

生

宸奎輝映畫堂深瑞旦華筵酒滿斟三鳳七雛樽捧玉
雙魚九鈞帶橫金未須人詫耆英會更看公求耄老箴
却此趙州行脚後百三十歲主禪林

戲效劉茗溪十二辰歌

華門鼠憂多唧唧我貧不厭瓜牛窄癡人虎視欲眈眈

我寧老守兔園冊莫愁龍具苦酸寒等爲蛇跗祇瞬息
試問藍閨馬不前何似金華羊可叱嬌羞已笑沐猴冠
卑棲那更爭鷄食掉頭一任犬狺狺掩耳莫聽猪嘍嘍

晚日既入紅雲滿空以東西言之此間去日入
處幾千萬里日既到海而其光上射於天如在
頭上非天高地小四面海濶安得如是因以
紀之

幾譯天西到海東日沈猶射半空紅吟思益信人間小

海濶天高地水中

天高地小水茫茫
取喻只如雞子黃
西日既沈光倒射
天中還是水中光

袁命士

言多奇中邑人誇得妙
無過六十花術學要須來處好
馳聲貞觀是渠家

題趙工部柞山堂

以半山五願水爲柞
自名其堂求余書扁

太白前身錦繡腸
字書搜盡入篇章
作歸田賦辭蘭省

取半山詩扁草堂自擬百園莊散木不誇五柞漢長楊
却愁金殿催班去風舞槐龍影正涼

和韜字謝後村和篇

狨鞍更合破花韜

親王而下鞍上
綉花隨品支破

揮手歸尋種玉田琢

句工如賈島佛引杯豪似翰林仙作蠅頭字無虛日辭
豹尾班不待年活底壽星公即是輕安尤勝者希前

九裊筵開喜更深金杯從客十分斟新詞歲歲歌縣天
回啓人人得碎金短韻豈堪勾白勾初心却似欠韓箴

如公搃是書融化柳腹多於漢學林

再和前韻謝後村惠生日詞

野客相過坐馬韉
論談大半是農田
生慙弧矢爲男子
老脫簪裳似散仙
錦卷新詞歌永日
茅簷小酌勝常年
癡因好佛蒙嗤誚
更敢誇張靈運前

老去劬勞念轉深
一樽聊爾可曾斟
中年爲拙辭宮錦
晚歲雖貧笑永金
破被與兒眠似鐵
敗氊留客坐如箴
箴與針同
多情曲意加題品
錯比唐溪與晉林

三和韞字二首寄後村

誰道林花不是韞山如奔馬下平田
哦詩不記身投老對酒猶狂興欲仙
勾漏丹砂尋舊令雲安麴米問長年
如翁一事尤癡絕醉却逃禪綉佛前

勝敗如碁閱世深夏商猶爾況戈斟
癡人倚柱思全璧達士揮鋤不顧金
穎自忸懣宜愈傳酒何殃咎要皮箴
過從怕聽閒言說聞早移家避入林

偶題

溪南溪北鳥相呼聽雨看雲足自娛不羨筆書黃紙尾
但吟詩撚白髭鬚身謀只合交猿鶴眼見渾如擲雉盧
堪笑少陵高自比到頭老大始知愚

再和柞山腸字一首

縣知書卷飽撐腸一倡殷勤十和章茅捲三重憐杜屋
株高八九羨韓堂利名誰信為韁鎖聖知人猶比桁楊
萬事不如祇浩飲葡萄切莫換西涼

溪居古榕甚佳未嘗有所賦得柞山詩卷借奇

字韻戲成一首

古樹婆娑誰手種有藤纏絡似髯垂但看窗草求溪意
自覺庭楸欠愈詩才拙豈能酬郢曲心降但合靡齊旗
吟渠却羨公家柞短韻長篇句句奇

春谷惠示榕橋精舍二十四詩借首篇韻賦一首

春谷因榕費苦吟爲憐夾道綠陰陰身藏巖澗風霜老
名入圖經歲月深北客未知題詠少南州莫向字書尋

鶯啼庭葉曾畱句獨有河東柳賞音

題僧雪岑詩

本自無鬚學撚鬚此於止觀事何如詩家格怕無僧字
聖處吟須讀佛書得趣藕花山下去逃名枯木衆中居
早梅詠得師誰是見鄭都官却問渠

題范月溪款乃集

款乃溪干入聽時忽傳新集到柴扉自慚我老眠雲慣
遙羨君吟弄月歸正始餘音何寂寞四靈苦思儘光輝

當行家數今誰是消得渠儂論錦機

送徐諮議總管

美矣軍諮議元戎喜借畱吟多磨盾鼻心久折刀頭梅
日相求去花時寄別愁天風題石處從此夢同游

括要翁精訓君於翁又賢吟工如射巧藁富已刊傳資
格宜分竹功名早著鞭從軍詩更好因鴈寄溪邊

郡圃小山大資可齋先生所作也石久散而池
亦荒恕齋來公補處疊之後之訪求舊記重

刊之仍續畱題之句以寄可翁翁又和之以
某同出可齋之門不鄙賜示借韻爲謝

湖嵌散盡重堆疊池碧堦多旋斲開舊記幸存新入石
勝游端待可人來

舊畱岸柳千株老新種池荷一度開此是可翁題詠處
元戎領客喜同來

石好歲深歐記在雨多雲為段遊開同門一士頭如雪
許待龍圖老子來

時方苦雨起齋一禱
即晴咸淳丙寅九月

吳帥用前韻以別再賦以謝

碧油幢下詩書帥吏案如山強撥開領客雍容游郡圃
柳間松下步行來

主人愛客情何厚盡日移樽逐處開古栢寒梅俱問訊
追思猶說海棠來

清晨玉帳方違拜一葉江干艤未開多愧元戎懷舊雨
殷勤惜別袖詩來

村居僻甚城闔遠避俗柴門久不開忽漫出山歸自喜

龐翁還謁恕翁來

題天風海濤

亭後千尋巖峰亭前萬里見晴空山藏落照生新月
海漲輕濤帶晚風世事浮雲變今古客游錢石徧西東
近簷溜雨霜皮栢却是渠曾識晦翁

題梁祕閣玉堂何似亭

放眼久知亭外景連朝苦恨雨昏昏紅飄落桂渾如雪
青失平林摠是雲與世相忘真有道休官曾不待移文

玉堂天上空回首白髮追尋我愧君

喜新晴和前韻

梁丈三徑堂中作

清曉秋聲枕上聞倚欄頓覺失眵昏
潮分新水添池水山放晴雲換雨雲
翠沈方壺如著色稻搖平野自成文
荷枯菊少梅全未風葉蕭蕭對竹君

題張尚書畫冊四首

松間睡道士

高枕松間石如儂未易知世情祇益睡
不是學希夷

犬

辭家何處附書歸
縱獵何年投綫去
斯入咸陽機洛陽
料知黃耳嗤渠誤

牡丹

生意草亦佳
可但蓮菊好
富貴本何心
莫以色見我

雀

勘破鵬鳩事
人間百念消
茂先老自誤
不記賦鷦鷯

菊菴相道人求贈

金匱要略卷一
拋汝菴中菊尋他檀上麟休將窮達事來語菊邊人

送建寧倅林太博用後村韻二首

清班早見揚休立自詭俄爲九仞翔教雨久霑儒館下
屏星還照建溪傍助行好事趨鈴閣課了康功向玉堂
禹錫文章終得力吾儕脩細要更嘗

家年愛友相期久注目雲霄看鳳翔半刺暫煩書紙尾
一翁分守繫籬傍多攜客上丹青閣易事賢居夷白堂
更喜宦游逢樂地戶無貴糴稻新嘗

寄題趙武子鶴泉

可人何事著斯名
知傍清泉築小亭
遙想倚風看鶴鶴
更須和月掬泠泠
君於醉後流應激
渠若來時舞不停
莫謾濯纓歌此水
會當沖翼上青冥

別林伯常國博

解印南來久卸鞍
未甘遮日向長安
洪都別駕何廉取
齋殿除書果趣還
再入美傳喧輦下
多情遠別到溪干
才名藉甚如君少
此去應須立要班

歲晚交親久寂寥
明時賸喜入旌招
玉融名邑雖多士
素從無人已四朝
我分長閒守龍具
君宜聞健侍雞翹
從今出處分岐路
對月相思夢愈遙

偶題

清曉焚香罷書窗
只自娛時爲五禽
戲閒看六牛圖
遯世元無悶
衰年不厭癯
圍碁三稚子
夜夜笑翁輸

題國清林氏海山精舍

取樂天海山不
是吾歸處為名

白醉吟翁頗似癡
當仁二見却無疑
但尋來處知歸處

莫把迷時待悟時風過更看雲不盡潮生長與月相隨
海山此趣誰能會也是禪關也是詩

丙寅再至水南吳景朔家

舊游人物轉頭空此地重來恨不窮聞笛久懷中散氏
對床僅有小蘇公門前旋闢園池好壁上芳題子姪同
尤喜芝蘭書種茂迎門歡笑挹溪翁

景朔男子謙姪定
子皆請舉諸孫亦

好學

和後村問訊水南失約二首

卷一
憶昔從容陪燕几別來岑寂守漁蓑論談苦羨江河決
離索深慙歲月磨覲面難逢善知識鈍根空比老禪和
當時言語何曾會路滑山高敢再過

學荒久欠親談麈居僻誰同理釣叢砂欲作糜那解飽
塲難成鏡只空磨出乘雪興思安道歸逐風吟笑志和
賴有先生前約在掃門直候愈軒過

題劉某詩集

鄰居前此未相聞到手新編喜得君一事更令人動念

曾吟詩謁網山墳

集中有謁網山墳兩絕句

夜坐偶成

涉世纔深誤轉深
鬢毛贏得雪霜侵
人多癡到未來劫
禪要空無見在心
晝暖枕書高鼾睡
夜長樽酒縱狂吟
花開花落春何意
潮去潮來古即今

書窗即事

此心無著自超然
麤糲隨宜醉即眠
喜讀佛書非佞佛
賦游仙曲豈求仙
涪翁語忌隨人後
康節圖看到畫前

老盡蓬窗聊爾耳何曾敢道慕諸賢

竹溪鬳齋十一藁續集卷一

欽定四庫全書

竹溪鬳齋十一藁續集卷二

宋 林希逸 撰

古律詩

晚晴

雲收風止晚晴初
池減波痕見綠蒲
鷺入田行如數步
鷗隨林去似相呼
賦形宇宙真如寄
息意林泉不是迂
疎柳欲黃楓漸赤
來今去古幾榮枯

題吳司戶忠齋

名漢英穀城人乙丑科留忠齋知舉

事業心期在漢廷師生莫訝共齋名當年取履封留者
入夢祇因住穀城

題吳司戶思忠堂

我既題齋扁堂名却又同進思臣職分意慕世宗工欲
問傳心法無如盡已功游揚朱呂後先且學忠公

三和除字韻

終歲吾伊祇自苦多生習氣未全除却嫌俗態騷騷

爾寧作閒民皞皞如肯羨孔光靈壽杖且燒韓愈送窮
車一編受用床頭易却似忘筌已得魚

詩贈友人程鄉次子和甫兄

苦戀庭闈戲綵衣其言雖訥未全非旁人競喜廣長舌
之子還如杜德機他日必多麟抱送妙年肯歎雉孤飛
但能寡過何妨拙却恨鄉閭識者稀

雨中懷後村石塘之約爽矣

好讀書多晝苦短細行厯到歲其除無端竹雨蕭蕭下

可奈松風謾設如更僕詩來幾滿篋過門約在待安車
大寒不出空回首何日同觀濠上魚

四和除字

白髮餘生甘寂寞丹書微累幸蠲除天留老眼諒人只
雲本無心於我如千歲不知碁幾局二乘且論寶三車
香山見徹人間事斷道爲龍苦似魚

客至五和除字

衡茅有客同歡笑徑草呼童旋剗除
曷酒熟遲聊酤我

藜羹生怕有卷如夜長不必論升斗歲晚能忘誓笠車
鄰舍多情還解事頻分野菜饋生魚

和披字寄後村

不羨新雕繡轂馳不嫌自織草衣披談禪客至眼俱碧
聯句人來髻似椎愁絕只憑杯遣興意行全藉杖扶衰
舊游歷歷天南北夢不能忘隨所之

送陳莆田 個

歸時得
後村力

邑以灘名處處同此灘加似打頭風吟多正恐招窮鬼
怨作無端謗殺公怒欲懷磚嗟薄俗義為全璧賴宗工
衝寒溪上攜琴去羞澀囊如子美空

和春谷用弓字見寄

奴去看魚笥兒尋射鴨弓養病三徑裏取友一溪中日
苦經簷短天如罩野穹過從人絕少訪問愧春翁
星曉有殘月明明掛一弓四天垂野外萬象蓄山中水
動知冰薄林疎見谷穹傍人應比我觀物邵家翁

齊物書非放師傳自子弓人多談稷下我獨守環中道
貴身無賤名高位莫穹元和雖五相千載一漁翁

三和磨字韻

休憶朝攜香滿袖從教人畫雪披蓑詩狂黃鶴樓堪碎
頌美浯溪石欲磨安得谷論肥定武却嗤甫貴瘦光
和老癡只弄窮生活散帙多聞暮鳥過

再和除字韻

洛下玄功須究意人間雜念早消除才情向老無多許

夢覺何時解一如失馬塞翁云得馬數車柱史論無車

浮生寵辱渾閒事勝負真如射掬魚

掬音竭散
米之名

第三孫彌月小飲

茅簷喜得第三孫草草團欒笑語溫
晚菊客貽黃似蓋新筍兒喜綠盈樽
生涯素薄書差富舊物能留硯僅存
儒級傳來方四葉九龍入夢始曾門

四和除字韻寄元思別駕

多生已被禪勾引萬事祇憑酒破除
節物變衰黃落

矣儒功寡要白紛如懷賢疑似渴司馬避俗佯爲贖仲
車好友年來吟驟進相逢何日語姬魚

雨山徐總管袖詩見訪以道間見梅而作少畱

一夕次韻爲別

何曾問柳與尋花訪友輕車到海涯少爲梅吟看倒掛
坡詞倒掛綠毛公鳳會須水餽出褒斜霜寒盡夜同煨芋月過殘
星似撒沙村落常時無此客多陪僧話送年華

二

天放寒梅三兩花，殷勤粧點淡生涯。巡簷索笑忘霜冷，
倚樹長吟待月斜。君去定趨丹鳳闕，我閒但占白鷗沙。
孤山好處空回首，典祀何時到玉華。

玉華宮名見杜詩
孤山今為西太乙祠

三

岸幘衝寒嗅雪花，興隨雲遠到天涯。月知玉斧修成近，
星伴銀潢左界斜。佳客過從聊把酒，浮生聚散似團沙。
新吟何日重商榷，苦學無功鬢已華。

七和披字韻

意馬難調繫更馳

繫馬而馳

空沙莫爲揀金披忘機每笑碁

爭局愛禮時看齋白樵正月書因王不競變風作爲教
先衰聖朝可託狂歌樂況有羊何共和之

泳得男再蒙後村先生和除字見寄戲和一首

貧慣人人嗤不管老慙幼幼念難除有孫何必位爲喜

蕭戲父誰云翁不如張憑

夫子忘年容撰屢長文何日抱

隨車殷勤好伴腰鎌叟莫學嬌癡女覓魚

題朔齋鐵壁堂

耐久聲名參古柏絕清詞翰賦薇花幾聞人似南都老
再有公生朔黨家題扁不慚名鐵壁持荷更合侍金華
元城志業須翁了推美還看入制麻

堂以綸
言名

丁卯元日作

泰時欽柴已慶成金鷄赦下是茲辰百官班立樓前拜
萬歲嵩呼竿上人正喜含飴看稚子還叨祭澤及微臣
老逢嗣聖徵前夢三十年前歲在寅

庚寅夢應
今上御名

二日野望作

麥隴高低一樣青
淡雲籠畫雨絲輕
梅花爛漫開將盡
松葉稀疎落又生
遙企鈞天知夢斷
欣聞玉陛慶熙成
人人盡說新年好
除夕無風歲旦晴

丁卯立春作

歲陽更始財三日
輦路歸來第四春
野菜旋挑絲未細
村醪淺酌釀差醇
團圞弟姪何妨笑
淡薄盃盤莫厭貧
却憶先朝供帖子
傷心白髮舊詞臣

鄰園惠晚菊數月有花高大甚奇

菊種雖殊多短短忽傳一種自比鄰園過十尺高七尺
開到初春始小春團比蓋擎身極瘦碎如金散色常新
梅時得此真奇絕更有清香細襲人

放歌

讀放翁
詩作

朗誦烏棲曲數終乾坤何事老英雄縱令經有千名佛
敢道詩無兩放翁九萬里風來海外二三更月到天中
便教挽得銀河下今古閒愁洗不空

晨興聞簷雀作

晨起喧喧暮自棲夢回每每當聞難有渠何用門前客
廷尉當年見處低

石竺山紫雲恭老

得樗菴尚書書往
溫陵見洪陽岩

幾載空拳把疏頭新成樓閣石山幽未忘囑付樗居士
送紫雲師紫帽遊

師知緣熟向溫陵騎虎仙翁現化身袖有先容應得力

陽巖佛地位中人

紫雲仙
舊騎虎

雨後贈雁來紅

閩中謂
鐵樹

雨後欣欣綠萬叢
憐渠葉葉但焦紅
旁人莫作榮枯看
時節因緣各不同

先母忌日

丁卯

兒正癡時賴母賢
如今滿鏡白於綿
可堪遠日思存日
更向衰年憶幼年
夔早獨攜三稚子
世貧能有幾硯田
書燈督課無虛夕
曾解衣還束脯錢

有感

丁卯
二月

世事年來百色難
沈思觸目是憂端
田家仰麥嗟傷雨

海市無鮮爲苦寒楮欲秤提官自抑苗多走弄吏尤奸
時有秤提
推排指揮身逢昭代還如此獨喜三邊慮少寬

遣興

風流不羨三學士衰退甘爲一腐儒嗜古心癡迷黑鬼
見歐公與劉
原父簡中養生胎息學玄夫興闌日下新吟少靜勝

年來雜夢無醉後枕書時鼾睡長孫喚醒小孫扶

戲效梅宛陵賦歐公白兔

毛蟲雖小著仙籍云渠千歲皆化白中山山中衣褐徒

生長何年換顏色豈其孕育自卯宮又是金公付精魄
渠宗學孔非學朱拔毛不斲供書冊老蒙將軍縱獵時
遁向何方爲窟宅紛紛爾後更幾秦避世甘心滄苦柏
明時作意始出來五岳徧游無定跡多生曾識六一仙
知道瑯邪有新刻要尋此碑龜與螭何事乃被滁人得
滁人知渠慕醉翁翁歸已在雲霞中期翁千歲亦如汝
殷勤遠致提金籠傳誇瑞物徧都邑倡和千篇模寫工
翁攜入直金鑾殿渠應自比廣寒宮寄聲樹下檇藥者

汝伴嫦娥我伴公

三和菴字韻

新吟度度到溪菴
諷味銓錡似雅南
筆健稱雄一當百
韻嚴苦和二生三
捨襄陽外無新語
除謫仙來可劇談
覲面猶龍誰復識
杏壇人在庶知聃

題平遠軒

伊昔營此窗眼前
頗有趣往來多勝流
必和辟間句人事
一淒涼牕亦不如故
舊詩無一存誰復闢
其戶新來

改作之好景欣再遇清溪漾淺流長松列古路高下見
青山濃淡雲來去西齋平遠名移以扁其處我闔納八
荒令人心領悟星垂平野詩雲征遠遊賦倚欄拍手歌
百盞吸瓊露

新晴四和菴字韻

三月三日作

衰懶如僧不出菴雨晴春又徧溪南周天日度一日一
初夜月生三月三還丹只是安樂法虛白應難容易談
最喜無名公自傳何須儒學記齊聃

唐儒學傳
徐齊聃

偶題

浮沈上一虛舟久喜身心得自由
知我要須高著眼
逢人多是懶擡頭
詩名遣興元非興
酒道消愁有底愁
學聖玄宗提如許
莫疑老子習單修

別黃尉

止堂左
史之姪

梅隱多留譽
花殘乍語違
慈空縣棒在
廉得薦書歸
好是家聲著
賢如柱史稀
清時衡尺定
著意稱傳衣

山長潘同舍
南歸袖詩爲
惠奉和一首

南郡談經得譽還久知言行有防壇合從金帖檀書後
便入宮花院柳間雅抱清如漉明月俗情險甚渡揚瀾
慇懃話舊溪干去好友相期向道山

了不了語

龍去拔髯嗟帝遠鶴歸留語笑人非龐涓死怨悲題樹
豫讓酬恩喜擊衣

胥駕鯨來潮上下義鞭烏急日西東萬世不竭蠶取半
一是無窮樞得中

和元思朋微韻二首

吟清字字使人冰惠我多於錫百朋照破塵心如鏡鏡

鏡鏡相照
齊丘化書

續傳詩派似燈燈

燈燈相續
禪家語

句工可信堪呈

佛格老誰嗤要惹僧

鄭國詩壇
惡惹僧

但把功名付篇什莫論

青竹幾人登

杜詩

宮衣我已換禪衣讀得孤書頗造微晚歲斗思蓬闕去

早年浪奪錦標歸多生自苦滔滔是一悟應知念念非

八十年來念
念非放翁詩

投老但畱詩癖在美君珠玉入毫揮

苦雨

半春常值雨人嘆久難禁橋斷溪仍漲秋寒水更深老
天因底漏無日不重陰兀坐憑誰訴愁多只自吟

劉躔甫七十

四月初四日

早歲耽詩學樂軒如今霜鬢作吟仙回思同舍二三子
幾見生朝七十筵竺嶺佛來爭四日崆峒人在更千年
稱觴豈必纒頭錦醉舞何妨共釀錢

別吳帥恕齋

學問功深道得民但曾補處譽俱新來爲閩嶺詩書師
歸作甘泉侍從臣政劇不辭身自苦施多却似郡非貧
前賢好事推行徧玉帳如今有幾人

獵獵江濱萬綵旗戀恩非止送公時賢如司馬家求像
教比文翁學有祠半月趣行三被旨殘年惜別兩攢眉
東南民力閩尤困到日論思首及之

七聚人人苦戀行吾鄉一事更關情郡貧已極民縣罄
歲計祇於寺取盈官要板曹寬未許閩無保障害非輕

扶持有意公還去條約春初恰講明

今春恕齋方爲諸邑不濟權管區處

公來植纛我扶犁苦憶京塵判袂時
墀下一回樵服謁溪干幾度錦箋貽
去思定有愛棠集戀別空吟折柳詩
梅子正黃晴又雨風檣語燕夢追隨

送徐倉用後村韻

君王玉節選非輕遠部何如鄉部榮
得志可酬公學問用人如此世清明
名猶高似南州士性本剛於東海生
振廩豈應煩此老論思便合向西清

鯤橫學海孰知修萬卷曾中古索丘滂喜澄清真有志
籍違禮法亦如讎發棠事亟聊行錦活國忠存待借籌
聖要直臣流俗憚會須覽鏡說韓休

再用仙字韻答劉躔甫

劉生日
醺飲

柴車本不羨華軒吟苦何妨浪號仙扶老底須九節杖
歡呼還費一金筵正聞僧去坐長夏那得君來論大年
會面苦難辰去速柳綿飛盡見荷錢

題建安曹兄深居小藁

得君詩一卷自命曰深居苦愛驚人句多慙寄我書
絕知吟可老更問法何如叟已忘言久離鉤正待魚

二

伊昔君居里宗師有大賢字嘗疑呂啞詩怕爲揚顛堪
恨梁顛久祇餘棹曲傳九曲棹歌要令吟律細但學紫陽仙

題陳兄始鳴集

集編名甚雅之子信吟徒不是蔡聞籟應如惠據梧但
令鳴中律何用句成圖蠅蚓嗤時輩能聯石鼎無

苦雨

一春苦淋漓既晴差自喜四郊遽如壑晴日共能幾人
言山雨驟每點大如指新秧過半空農泣向妻子今年
種如金典質到衣被忍饑事犂鋤豈料今乃爾一飽強
營營天公難指擬先淫後必涸我慮非止此可奈漫空
雲如墨來未已長宵欹枕聽攬衣四五起滴碎愁人心
不滴愁人耳

太平蓮者草花也本如藤蔓好事者結竹而植

之其花大如當三錢四圍先綻中有一萼如
初出水蓮最後方拆想以此得名一花可十
許日鄰人饋以一盆亦自可愛推其所以名
者戲述一首

柔條細葉綠層層盤結何工豈易然繞竹似藤渾似草
開花如菊却名蓮知渠耐看令人喜入我新吟與世傳
性分本同無細大休誇太乙葉爲船

記事

四月廿
八日

清曉奴傳事異常白浮碧瓦徧銀床正愁炎夏多淫雨
那更陽秋記隕霜我爲太和思保合誰知小雅賦憂傷
中朝定有更生疏野老空添雪鬢長

送三文書院陳上舍入京

翁季能賢有月評頻年相與愧深情三文書舍新求友
六館英流喜得兄秋賦屢曾飛襴墨夜寒未肯捨韓檠
殷勤拭目看雙鳳同向龍飛榜策名

三文主席劉兄翼運相別

百尺劉牆未易窺筆無盡思信瑰奇早聞大字書氈墨
肯爲三文坐虎皮注脚根株談未了狀頭名第久相期
錦衣歸後如相訪却要重論茶荳詩

閒居

已喜塵緣斷雖然未盡閒筆因求字禿燭爲檢書慳可
愧家牢落難辭客往還苦須窮僻觀除却住雲間

六月廿九早題

夜來頗涼與月仲弟飲散再
欲一酌以薑醢蘿葡薦之

時難禁酷暑晚喜動涼颼已飲阿連去仍招歡伯來數
根煮蘆服一酌熱茅柴睡到窗明足摩挲醉眼開

謝石塘小孤山惠酒

好友憐余渴飲溪釀香每月入緘題分無內庫黃封賜
似有孤山赤幫支把盞慚非漿瑪瑙傾瓶尤勝碧玻瓈
三升美醞何須戀續也當年可煞癡

梯颼惠酒且有和篇用韻爲謝

襍被當年去省房村沽空憶御流香花城不靳分新

金部人集卷二
釀應笑三升戀帝鄉

入罈渾如琥珀紅誰家釀法似渠工爲憐漁父鳴鞭送
儘有醒人羨醉翁

贈僧宗仁回江西

少別溪干去于今識者稀腰包畱一鉢頂相稱三衣未
得逢漁住還如化鶴歸馬駒江上有著意訪禪機

題臨清堂

一派清流繞屋長陰陰古木隔脩牆枯梅照水橫疎影

新竹搖風送細香諸老舊游如洛社百年陳迹有溪堂
扁題祖筆真奇絕竚立沈吟兩鬢霜

題林桂芳洲集

丁卯五月十日
陳左秋轉求

知子吟情美工於學選詩音惟追正始派不入旁支謝
句人難夢鍾評世有誰匆匆酬雅意勘辨待他時

和後村三絕句

求齊若拙瑟徒工已謝孫劉不作公拋却巢由思稷契
許身却笑杜陵翁

卷二
談玄要似蜜中邊末學紛紛紙上傳擊竹捲簾如未會
要無疑去待驢年

衰翁分已絕塵緣自和新詩醉擊轅不是燈燈相照者
箇中消息也難言

再和

藝業雖多蛻不工差頭分付是天公之乎者也成何事
却是天公誤此翁

白髮攢眉住道邊錢荒糴貴怕人傳溪干早稻垂頭久

次第今年似有年

少小田家有熟緣
自騎牛背賦犂轅
閒思耒耜經高古
朗誦龜蒙數百言

朔齋惠龍焙新茗用鐵壁堂韻賦謝一首

天公時放火前芽
勝似優曇一度花
修貢慙煩鐵壁老
多情分到玉川家
帝疇使事催班近
僕守詩窮任鬢華
八椀能令風兩腋
底須殮菊飯胡麻

六月頻雨

雨患先淫後必慳春來數月爲眉攢如今早稻黃幾徧
却怕收時雨未乾

春雨傷多衆慮深那知六月似梅霖天公事事俱難準
掃盡閒愁信意吟

又一首

講堂
前作

半空如墨半空明亂洒斜飄却又晴細柳牆邊飛拂拂
隨風不住帶蟬鳴

三文祠堂七月二日禮成作

九龍山外築祠宮崇祀三師敬則同此禮獨行秋遠日
身曾逮事樂軒翁

明星落處是溪邊回首如今四十年清曉深衣來會拜

人無少長識師傳

樂軒沒於子晦宅中正在小橋之側明星事見先師傳

在三之義父師均往事追懷等念親當日西軒同社友

相看白髮只三人

是日會拜獨余與月仲弟嗣功林丞

卜築雖殫歲月勤事於州縣不相聞祠田更擬圖升斗
要與春秋祭二分

別莆陽郡齋張文學歸建安用後村韻

君住壺山叅請徧樗翁却似嶺松孤學如禪派求瀉仰
師比醫宗要扁俞到此幾嘗名譜荔歸歎獨憶故家鱸
我慙九曲身遙領空誦仙經說黍珠

再和自賦

意散久知流不競交窮甘與月同孤酣歌斫地憑誰聽
心事箋天恐未俞何必紅雲班立鵠只愁赤辟網無鱸
身名自要分輕重人世多慙彈雀珠

後村先生再寄新出名荔賦謝一首

遠使殷勤訪草堂見書已似飽瓊漿
曾叨獨樂園中賜猶寄端明譜外香
珍重朱藍分五品衰殘白髮喜初嘗
燈前把玩如珠顆強忍饒涎且度藏

清古源以隆茂宗畫華池佛求跋

畫如禪有派此派自公麟試我銀絲髮
幻渠金色身淡無脂粉氣清與雪霜鄰
具眼須珍惜休將示俗人

七月十五日作

早禾已熟連日風猛頗以田間爲憂
朝來得雨雖小而風止矣喜而賦之

連日祇愁穗落空松飄竹斷似飛蓬
喜看密密漫天雨止得蕭蕭捲地風
儉歲久難禁貴糴早秋今幸有全功
田家更仰冬收好倚柱攢眉祝化工

竹溪鬳齋十一藁續集卷二

欽定四庫全書

竹溪鬳齋十一藁續集卷三

宋 林希逸 撰

古律詩

夜涼飲罷月中作

早秋涼夜那無酒
明月清風不用錢
重露正隨松葉下
飛星忽過柳梢前
騎鯨曾有李十二
控鶴今無員半千
頭白如綿空醉舞
歌長意遠有誰憐

懷古

萬事信前緣陶窓穩醉眠笑他名下士底似飲中仙樂在身何羨閒多性所便不窮能有幾試數昔諸賢

二十日待月有感

秋來餘暑未能清夜久涼因露氣生星影漸微斜漢落月華欲上半空明人間寒燠能無變世事更嘗孰與評不鼓昭文深有意宮商纔動幾虧成

題陳道古留遠堂

卓山憲使之兄

乾坤不毀易寧熄風月常新詩豈亡可但功名須久遠
也知道味更深長留題底要窮東野取友何如賢李方
料得對床吟樂處平章歐蔡到程張

詠蓮花

梅有幽人骨蘭如處子姿二者豈不貴清矣仁未知美
哉水芙蓉百花誰庶幾可愛非可狎不癯亦不肥充然
德之容瑩矣仙之肌芬芳不容挹既遠而有遺洛陽妖
艷品紅紫薄易萎東籬敗壤相著枝黏如糯此花雖已

落泛泛看紅衣有房如粟玉尚以金絲圍吟詵苦不足
賦予何其奇因思愛蓮說稽首百世師非汝溪不愛非
溪不汝宜何人斯取斯有道者似之

遣興

車輪到處碾成塵苦樂伊誰見得真蟻聚萬緣皆假合
駒陰千載幾新陳雖云入息非出息或說前身有後身
此事謾然成諍論且看古月照今人

玉水記方流

白傳省試題偶讀
其集同賦一首

玉水何從記工因下璞求若非藏異寶那得有方流遠
派來元圃潛珍向某洲璧沉疑月在斗折認波浮山鬼
休持獻江神不暗投磬裏何入海應爲訪鳴球

和王臞軒舊題紫閣寺詩

余初識此寺是臞軒約飲題詩時也今甫三十年寺
已中廢余守郡始復之丁卯寺僧攜此詩來訪和付
之

閣爲山名紫松依水更青僧談疇昔事我記始初經敗

壁題仍在臞軒喚不醒箇中安穩住但要主人惺

問訊後村目青

前書云食荔
多得此疾

赤膏因何久未除客來多爲荔分疎苦云牛背寒光減
病在蠅頭細字書老學常時資共訂詩筒兩月頓成虛
人間未有醫龍手夢索仙翁擬訪渠

清曉

清曉沉思自點頭年將八十又何求便令鴟鵂扶鳩杖
底似漁磯弄釣舟鄧禹不妨嗤寂寂司空自信合休休

年來點校書多在但囑兒曹著意收

梯飈遣惠菊糕且以鐵壁和篇與蘭闥魁卷示
教戲用前韻以謝

詩來已似風敲竹飮巧還如雪糝花便把菊杯邀酒伴
誰將糕字問吟家獨憐卷上文成錦却守琴邊鬢欲華
飽聽溪千人頌詠鳬歸早早進三麻

月仲重九生朝喜賦二首

自得生涯一室中不於牛斗問窮通傍閒婚嫁先時了

隨分衣冠與世同伊昔阿奴俱養母如今子季亦成翁
相看各喜貧强健對菊休辭酒盞空

長年冷淡似難堪自比榮期樂有三就書卷中時借問
除杯酒外老何耽定知丹桂還兒折且把黃花對我簪
好趁月明來痛飲不妨握手共迂談

贈別張養晦

訪我溪干住蕉衣換袂衣甘同蔬飯久飲了菊杯歸論
藥方書熟脩丹嘖息微浴水還啜火此事世應稀

飲酒極熱

如火而盥沐
只用冷水

遣興

於魚於蟻皆非計爲馬爲牛一任呼文字要須心自肯
功名只怕命元無癡人底信高僧點俗士從嗤我輩迂
老作凡夫差了事得閒不厭弄心珠

即事

學必苦心非易事世多抵掌是癡談評量人到九分九
指擬天窮三十三徹底書須隨字解造微詩要似禪參

眼前定與誰商權忽謾狂吟付一酣

寄興

黃花未有紅花盡秋思撩人欲上眉耕不逢年難靠筆
窮知有命錯冤詩旋沽來酒聊供客留讀殘書要付兒
猶向醉時歌袞袞少陵雖老有些癡

長孫遣聘五更戲作

生涯太極一圖中白鷓猶鳴上下風蟻穴蜂房人世是
鴟媒鴟婦性情同誰家不欠兒孫債緣法還歸造化功

月下有書何日定一門三見線牽紅

祖子孫皆婚方氏

得京中書

故心人在貽書及禿鬢翁慚信道癡千卷一琴甘隱矣
五窮三揖喜延之空山賸擬藏書去好景祇愁得句遲
倚杖看雲陶處士樂夫天命又何疑

夜坐偶成

涉世纔深誤轉深鬢毛贏得雪霜侵人多癡到未來劫
禪要空無見在心晝暖枕書高鼾睡夜長樽酒縱狂吟

花開花落春何意潮去潮來古即今

三十年前嘗與陳劉父論詩云本朝詩人極少
荆公絕工綴尚非當行山谷詩有道氣教臞
菴諸人只是俠氣余甚以爲知言追懷此友
因以記之

目斷千山嗟宿草言猶在耳奈從何文人縱有詩人少
俠氣不如道氣多哲匠久埋泉下骨吟徒今似法中魔
佛云五百年後魔生
吾法中壞吾道場
吾非具眼空饒舌自掩柴扉適意

歌

癡翁

癡翁癡處苦難言半似禪宗半似仙
適意酒杯中味道
寄心詩句裏參玄雖然也作人間夢
但覺元無俗下緣
剩把殘編消日子不妨吟罷枕書眠

寄興

少時攻苦已成翁學似無功亦有功
身外事皆隨順去
人間念已掃除空癡兒莫指第二月
快士休誇九萬風

世界雖然許空濶等閒分付酒杯中

別躔甫

一別三秋喜我過舊游如說夢南柯功名會上前緣薄
燈火社中遺恨多幾劫曾爲詩法眷兩鰥堪號俗禪和
相看未久匆匆去可奈能吟不飲何

十月朔日作是月十一日立冬

靜看歷推移天公巧孰知朔先旬日改冬早小春遲袖
手閒中老歡顏乳下兒小窓殘藁在續紙旋抄詩

二

身外無餘念殘年守舊書
窓先寒日補園趁小春鋤邊
耗多疑信郵傳久缺踈
往來南北客時得問何如

十月初六夜偶成

寒鷗歸盡暮烟生
野草牆根絡緯鳴
嶺外斜河雙派入
簷前新月半輪明
厲階莫甚董狐筆
避世寧隨桀溺耕
堯舜不驚祇愛酒
癡人往往笑長庚

懷後村作

無端對酒忽愁生酒欲澆愁愁未平老我阨窮如子美
故人憂病似丘明常時交訊無虛日每日迂談盡五更
手簡近來兒代作得公手簡若爲情

十月九日回書偶作

炎炎翁翁何關我是是非非厭聽人莫謾揣摩當世事
且須康濟自家身康節語囊空米盡挨排去菊老梅遲問
訊頻南北尚留書債在未能痛絕爲情親

客云今年小限甚佳戲題一首

曉呼兒讀新詩草畫引孫看槁葉蓮但得天教閒度日
休將星筭小行年耐饑不管塵生甌
書筭猶存紙裏錢
一事近來堪自笑關心數月爲橋緣

寄劉躔甫

涉世還須著眼高塵浮浪汨世滔滔功名縱似秋風客
見解何如春夢婆握手縱談拋我去關心往事悶人多
西軒舊友今餘幾掩卷長吟歎逝波

昔與諸友同登香城最勝閣有長歌一首今壁

題已失僅記炊烟不盡愁不盡七字追懷往事遂爲律體以足之

曾向山巔望海濤遠村簇簇樹如蒿炊烟不盡愁不盡
立處愈高見愈高追記壁題纔一句同游滙聚惜諸豪
等閒試足成章在却嘆吟時鬢未毛

秋闈放榜作

三載掄材棘屋中不知老盡幾英雄爭先誰是穿楊妙
偶得依然拾芥同衆譟似狂俄寂寂

試後鄉人聚飲捷而喊謂之喊榜捷

傳未定愈忡忡人間萬事皆兒戲注目長空送暮鴻

晚步偶成十月廿八日

半空濃碧雲成嶠上有明霞如野燒綠田黃犬吠行人
白鳥青林送殘照連朝毒熱勝三庚萬木號風無一竅
松間散步信意吟安得孫登與長嘯

老來猶喜看書清晨有警書以自砭

千古興亡大畧同自爲兒戲是天公人如流水浮雲去
事落殘編斷簡中已分塵埃嗟齒髮休將點畫污心胷

香嚴喜把經遮眼悟處雖高性未空

禪學元非妄詆訶聲前句後搃成魔本來性即虛空
是自障塵因聞見多過眼皆如雲不住舉頭但看月如
何傳燈諸老還癡絕只翫心珠底用歌

傳燈有
翫珠歌

偶題

求之有道果何如莫信鄒書恐自愚生怕不祥如躍冶
底曾大叫肯成盧言禪尚要空諸有定分誰能得所無
却喜天公最公處人人可索是玄珠

游應天寺

白嶼有僧初業農因見蝦蟇躍苔而出忽然省悟去而爲緇徧游諸方老歸西禪寮居帥以某寺招不就訪之寺中煨芋烟滿室竟不出戶帥敬嘆良久而去此疇昔所聞也鄉鄰有寺曰應天雖相去不遠未嘗一至偶因溪行見之四圍破碎中殿竟存西廊小屋一緇尚畱問其寺所由起則曰開山白嶼僧也其名曰智淳塑像猶在雙眸異於人崇寧四年有旨住西

寧州萬壽師進偈辭既而還鄉遂初此寺紹興壬子
也舊碑載三偈磨滅尚可讀僂指寺成纔兩壬子其
季方十六歲入亦不薄以主僧不得人官吏又重困
之遂爲不濟人間百事興廢不常良可感慨因賦一
首

萬安橋北破僧坊追數梁題歲月長師祖碑殘微有字
世尊爐在久無香蝦蟇撞破青苔去龍象淒涼宿草荒
四壁不畱風雨入僅餘一衲住空廊

偶懷丙午丁未同朝諸公悵然有感壬戌再預
經幄先帝猶記小臣爲安晚門人

前朝舊事怕追尋欹枕更長忽上心七貴五侯俱夢斷
李太白詩一翁六士謾愁吟雪歌黃竹游何邈雲叫蒼梧恨
更深再割鉛刀尤可歎白頭羸得淚沾襟

和吳檢詳飛躍亭韻

心有靈淵性有天得渠樂處自難言誰傳仙去曾騎鯉
況說南征看點鳶

聖師知遠又知微率性而修教迪彝物性高高還下下
與渠相賞莫相違

六爻萬象理俱陳物物皆誠在反身飛鳥音遺魚信及
中庸盡性易窮神

夢如爲鳥何妨樂計得於魚底是愚化化生生機在目
紫陽深意注陰符

有我何能與物親物無非我學方淳不知目送飛鴻者
何似觀魚濠上人

躍躍飛飛共太虛癡人底解見遺餘師傳喫緊知何處
樂在中心不在書

萬善皆由一念基學能自悟不妨遲得他淵默天游處
何異樞衣侍子思

題范晞文詩藁

武資
請解

年既新編比碎金知君風月滿清襟才高欲進竿頭步
興到還磨盾鼻吟字有三千何日奏藁留五七已年深
漢廷射策無蘓李千載河梁是正音

答吳檢詳用饒字韻見寄二首

星省論文久追思去日饒同趨花底路執別柳邊橋

山泉

出使別於江漲橋

我已甘肥遯公還惜髀消新詩時見寄莫怕

鴈程遙

白髮溪干住雖貧買竹饒名慙五雲吏夢斷七星橋烹
鯉梅春小歸鴻柳雪消兩鄉同此月廬阜亦非遙

曉起即事

枕上吟安未了詩披衣趺坐自支頤今年暖過冬強半

昨夜霜濃曉始知腰帶愈寬只強束髮梳常落不多絲
衰殘却喜身强健歲稔村沽醉度時

和梯飈薛宰鏡中我韻

菱花泓裏炯相親久翫還疑假是真靚面果爲誰氏子
回光須照本來人正慚我老羞看影堪笑渠癡苦效顰
陶叟但知身有二當年問答只形神

送劉漳倅

撚髭袖手耽閒久歲晚俄聞輅騎催翁喜爲親負米去

守需監郡及瓜來但令岸幘歌司馬莫戀斑衣戲老萊
迂叟有康人所羨竚看扶對殿中槐

南郡久聞非舊比民貧甚矣吏姦深憑熊正試活人手
展驥仍多及物心箝尾決無閒署字支頤莫謾喜工吟
殷勤惜別龐眉老洗耳溪邊聽好音

再和鏡中我

把照相看意自親是身非幻亦非真徘徊似月歌中我
上下如冰夢裏人喻以不言只見色愁於何有亦同顰

本來面目伊誰識却詫僧繇解寫神

第三第四句一作似歌月處徘徊我

如夢水時
上下人

三和鏡中我

百骸雖在果誰親本地風光見是真
隱几正忘吾與我開奩忽訝彼何人
叔敖還許伶優學西子何如里婦顰
遙想當年游鏡殿化身千百未爲神

丁卯重作化龍橋嘉平甲子脩梁方舉兩虹忽
現里人皆以爲瑞輒賦一首

下手高秋忽暮冬
霜晴水暖荷天公
舊碑語妙誰能繼
新築工多事却同
健筆早題需駟馬
脩梁朝舉現雙虹
殷勤著意溪干友
應識橋門況已通

三偈寄白沙和尚

疊石爲梁歲月遙
溪神毒發恣飄搖
萬事有緣人贊嘆
白沙師造趙州橋

橋長百丈架溪橫
半水工夫次第成
人言不是慈悲力
那得霜冬暖又晴

作緣道者信難哉小工石匠亦持齋世間苦行誰能此
爲向白沙會下來

玉融嘉禾歌

新來盛事喧南北爭道玉融調玉燭乍可優曇現出花
未見嘉禾長似竹一莖五穗各垂頭千人萬人齊拭目
元戎如佛令尹賢清朝有道吾君福來處況是太平鄉
此事須傳瑞應錄便當圖本上九天看取三登上上熟
送方巖尹到省

可人家世文章錄騎氣如虹向上都姓字儒流稱作者
工夫聖處及原夫臨軒黼黻新龍御射策彤墀引鳳雛
鶴髮溪翁勤洗耳首聽翁季共傳臚

送方兄

岩尹之子次
雲正字玄孫

清姿乍見似蘭芽未識多聞士友誇健筆如翁宜跨竈
著書先世久傳家妙年秋日高攀桂來歲春風早看花
竚聽龍飛新進士一門姓字耀京華

寄題陳非潛達觀堂

詘信時也古猶今耐事閒居且醉吟看破人間須具眼
馳求身外枉縈心樂常在我窮何有名欲爲賓見未深
聞說君如濠上老會當握手論升沈

子真昆仲用虹字韻堅十七之約因眩而爽和
以謝之

握手歸來四見冬窩中風月憶先公情知夢逐飛鴻去
愧與饑吟病鶴同既老豈應忘舊雨相尋恨不渡橫虹
雲龍上下心期在彼此祇憑一念通

答子常

清曉霜晴不似冬多情剩擬謁龐公若無檄得頭風愈
却引帆如弱水同見訝令人時阿鵲清吟惠我氣舒虹
殷勤一使來何遠雙鳳華箋袖兩通

和福清鹿鳴宴詩

雪花飛舞上貂裘此去朱衣定點頭字奏三千高射策
璫垂十二拜凝旒鄉邦正說龍年好吾輩相期鵬路脩
日下五雲知有兆瑞光先向玉融浮

和後村答空青韻

病能崇眼似波旬聞說仙方妙入神定要空青爲藥使
解除翳赤見瞳人僕貧何計求珍劑天壽斯文保玉身
岩電竚須光爍爍檢書看劍樂千春

和後村韻贈硯士方生

精能磨石似磨磚巧手馳聲積有年想見割來雲製作
妙如修得月團圓我雖成癖耽求硯家苦長貧恨少錢
却羨樗翁藏甚富鐫題欲付子孫傳

溪工割紫雲
李賀端硯詩

橋緣漸畢再用冬字韻

未雪爲梁正御冬主緣賸喜得支公如膺下手知誰會
與洧褰裳涉不同列屋饑貧幾似鶴高軒來往謾如虹

過

高軒成裘豈有毛堪聚不待青銅助半通

趙州問僧趙州石橋誰造

僧云李膺造州云當初如何下手僧無對州云既知造橋問著下手處却不知

送方汝則西上

同年之子

才華少日早崢嶸萬里鵬搏始發程丹桂籍中曾定價
金花帖上合書名同升每爲翁稱屈此去深期子有成

便好輸忠酬聖問
臚傳聽取最初聲

送劉兄西上

乃父同行

春光已入柳條催
雪後孤山尚有梅
泉上老人攜子去
天中多士待君來
絕知戲綵怡顏久
便合看花得意回
遙想端門迎馬處
不妨翁季共傳盃

天中多士劉禹錫
送吳應制舉詩

戊辰元日作

除夜暗而無風鄉
人以爲豐穰之兆

雲暗長空夜不風
新年又與舊年同
身前百念翁俱足
但幾鄉田歲屢豐

初二日作

一飽抵期與衆同殘年自分樂溪中此心久爲雲留住
猶夢持箋入帝宮

象祖戊辰元日初冠仍拜勅命

老得渠爲第二孫加冠還已向春元藍袍試拜癡翁喜
初勅題名聖主恩好續世科如汝父勉求師學大吾門
一樽長幼團圞笑雖愧儒酸禮畧存

臨清堂前觀紅梅作

濱溪竹伴老梅叢一種風姿與杏同
直者倒垂橫者瘦
水中同漾影青紅

送林少嘉西上

聲名早出自兒曹場屋尤推筆力高
老大詩魔空白髮
幾多榜少已青袍窮通有道吾何畏
文字隨時看所遭
簪取宮花歸錦後不妨痛飲誦離騷

送吳子謙西上

君家學問富源流世守書窗志未酬
曾記麒麟初抱日

喜看鵬鶚再橫秋龍飛恩數優多士臚唱聲名占上流
我爲汝翁期望汝捷書聞日報溪頭

送戴兄西上

端溪簿
之子

乃翁白髮棲鸞去夙志勤勤待汝成自古文章有定價
如兄詞賦合先鳴今年恩數非常比上甲科名著意爭
語別溪干聊贈句南歸矚看錦衣榮

送王稅院西上

詞場百戰氣尤豪此友真如老伏波本色藍袍須用著

到頭鐵硯豈空磨向來鸚薦飛騰屢此去龍飛恩數多
遙想玉階臚唱後小璫寬句看揮毫

用韻送徐平父西上

徐釋之後
艾軒外孫

鳴鞭西上訪漁村倒屣霜朝喜及門
豹隱頻年聊蓄銳龍飛今歲有殊恩
誦先朝賦知名祖讀外家書見此孫
千載艾軒吾敬慕袖中錦軸兩詩存

以老艾墨跡二
俾余書其後

送林汝大西上

一第於兄何足溷相期十載恨悠悠
未聞鯉化三層浪

但見鵬橫幾度秋手妙八叉時輩服眼迷五色主司羞
舒徐有待知天意要作龍飛榜狀頭

送陳清夫西上

健筆朋儔推許久芬芳幾播桂花秋詞場多羨君叉手
省戶須看鬼點頭昔送廣文生有序今無瞋睡漢爭籌
高科遲取君休訝恩數龍飛榜最優

送林毅夫西上

乃父特奏仕止法曹昨賦挽章
末句押臯字正以此見能賦

乃翁賦手妙馳名白髮青衫恨晚成宋玉大招慙老友
枚臯末句屬吾兄專場見說詞鋒銳跨竈應知話柄行
聖御六龍新策士輸忠不厭字縱橫

戊辰謁伯祖惠陽使君墳三絕

一山雙脈兩翁藏最久凋零長一房誰道敗牆荒草裏
冢中枯骨昔金章

少日春秋學最高年踰弱冠掇危科也乘五馬鵝湖去
埋玉淒淒草一窠

手足情鍾共處埋榮枯頓異可勝哀長公松下無人掃
三從諸孫歲一來

惠陽與山齋提
刑相並爲墳

送余兄西上

曾祖乃祖俱龍飛
登第年方十八

得意秋風早香浮桂籍中清疑衛玠是年與賈生同鵬
化多諸從龍飛上兩翁此行宜趾美竚見賦摩空

竹溪廬齋十一葉續集卷三